

泉州府志

第二十二册

卷之四十四至

卷之四十五

K295.7

2

泉州府志

第三十二卷

卷三十二

卷三十二

AC 2007
24

泉州府志卷之四十四

人物列傳

明列傳九

李廷機

王道顯

李獻可

李光縉

洪澄源

黃汝良

楊道賓

何喬遠

劉宏寶

林欲厦

蔡守愚

沈大易

李廷機字爾張號九我晉江人貢入太學隆慶庚午順天鄉試解元萬歷癸未會試第一以及第第二人授編修陞侍讀改右中允累遷洗馬兼修撰侍光宗東宮再遷左庶子直講經筵尋改祭酒歷少詹事南吏部右侍郎署部事兼署戶工二部事改禮部右侍郎轉左兼侍讀學士陞禮部尚書兼東閣大學士在事九月被人言乞致仕不許久之乃許加太子太保予銀幣馳傳遣官護行居五年卒是爲萬歷丙辰帝命卹錄有加廷機沈靜斂飭彊立有守其爲舉人時讀書山中再上公車張居

正延教子不赴入吳中授經於申時行二年教授糊口
不肯向有司干謁既取高第束身如諸生使封趙藩還
授書小內侍己丑分校禮闈陶望齡出其門甲子典試
應天取士得人乙未復典武試當官勤事無一日不朝
叅不敢效世套請告養病交游餽餉一切辭卻第以節
約當治生曰羔羊之詩誦大夫節儉正直夫惟節儉正
直出焉平生議論動稱古人出處之際自謀於心隨時
據理行其所是其以宮坊侍皇子講學每四鼓呼長安
門入寒暑風雨不輟爲祭酒以整齊嚴肅約士曰此高

皇帝之訓今人不守高皇帝訓輒遠引敷教在寬之文
夫所謂寬者乃多方勞來輔翼欲其自得之謂豈以縱
弛哉其吏部南京典京察無偏私兼攝戶工二部綜理
精密奏行軫恤行戶四事商困大蘇節縮奇羨度置無
用之資葺外羅城一百三十里孝陵周垣三十里歲歲
省水衡萬餘金他如皇城直房公署廟祠牌坊橋梁飯
堂一一修治或謂廷機公翰林官顧肯親俗事廷機曰
有俗人無俗事人不可俗天下國家事何言俗也在禮
部時妖書事起捕治甚嚴時沈鯉沈一貫二相不協會

楚王華奎因禮部右侍郎郭正域發其餽遺書誣揭正域不法數事廷機微爲解沈一貫欲藉妖書傾正域及沈鯉帝謂妖書實出正域手逮訊正域從人乳媼下多官廷訊五日不決帝怒甚有詔責會問官有朋友情深君臣義薄之語多官計無所出正域危甚廷機獨以身保任正域爲之翼護會緹綺緝得皦生光旣引伏復掠治令具同謀主名衆在猶豫閒御史沈裕言於厰璫曰事不決縉紳荼毒矣疏請專罪生光廷機與裕同官涂宗濬俱署名上趣定獄生光亦慨然承伏株連遂絕廷

機精簿書以王府事多吏輩奸不可詰乃定爲簡要法
有請立奏吏無所容私中官亦無從齟齬諸宗德之爲
立生祠四區又革貢夷之車價三萬寢高麗之戍卒三
千飭殿試之規以閑進士定殿試之期以便歲貢剗屋
以居官施衲以活凍諸多興舉三十三年夏雷震郊壇
旣率同僚條上修省事宜復言今日闕失莫如礦稅宜
罷撤不報其冬類上四方災異秦王誼漈由中尉進封
其長庶子應授本爵夤緣欲封郡王廷機三疏力持王
遣人居閒固拒之特旨許焉益府服內請封亦力持不

可廷機遇事有執尤廉潔自念一介窮儒巍科華貫當
思所以砥礪樹立報荅君恩無使死之日有餘粟餘帛
以累君父帝亦知其清甲辰歲朝覲之期於禁中謂左
右曰此時京官不忙惟趙世卿李廷機兩人不與外吏
相接也時內閣止朱賡一人給事中王元翰等慮廷機
入輔數陰詆之三十五年夏廷推閣臣廷機果與焉給
事中曹于汴朱一韓御史陳宗契持不可久之卒列上
帝雅重廷機特命入閣叅機務三辭而後拜命謝恩疏
言人臣惟知有主苟可自致於主者無不盡有益於主

者無不爲不知有身不知有家不知有交游往來不知
有毀譽得喪必無一念不可與主知必無一事不可對
主言自是而外有不可則止之訓焉甫視事而元翰及
同官胡忻攻之不已帝爲奪俸已而姜士昌宋燾復以
論廷機被黜羣情益憤廷機力辯求罷又疏陳十宜去
帝慰諭有加明年四月主事鄭振先論賡十二罪并及
廷機廷機累疏乞休杜門數月不出言者疑其僞於是
御史楊師程等給事彭惟成等刑部主事熊應都察院
照磨郭良翰共二十五人交章力攻而惟成三疏尤力

廷機求去不已帝屢詔勉畱且遣鴻臚趣出堅臥不起
待命踰年乃屏居荒廟人跡都絕廷臣猶有繁言至四
十年九月疏已百二十餘上乃陛辭出都待命同官葉
向高言廷機已行不可再挽計首尾五年然後得命臨
行尚責中璫不邀挽乃厚恩數而歸之廷機雅慕清淨
畫一之理欲朝列之間遵令甲守職掌省論議以奉法
循理爲先此時士大夫重氣誼尚建白時時軼越所守
官而廷機不喜之以此攻之者衆且急卒之清節皦然
不可得而誣也當輔政時四川巡撫喬璧星銳欲討鎮

雄安堯臣與貴州守臣持議不決廷機力主撤兵其後
卒無事自言曰予在政府九閱月惟主張四川撤兵全
活黔蜀生靈省饟運俾安疆臣兄弟不至爲播州之續
此一事差足報國耳年七十五卒贈少保謚文節特祠
祀學宮所著有四書臆說春秋講章通鑑性理剛宋賢
事彙編大明閣史國朝名臣言行錄燕居錄文集二十

八卷

明史叅閩書
李鹿巢文集

王道顯字當世號瞻明同安人從紫溪蘇濬遊邃於易萬

歷已卯舉人癸未進士任台州司理慮囚多平反署庭

篆及天台黃巖太平等邑實心行政不以傳舍視代庖
奉檄查盤所致常例槩卻之入爲御史卽抗疏劾兵部
尚書王鶚失邊備請以王遴代所條陳悉中機宜出爲
青州僉事青故多响馬好劫鬪道顯設法擒治爲之少

變遷雲南叅議丁內艱歸民尸祝之起浙江兵備肅衛
伍核才官倭寇聞風遠遁遷湖廣按察使解組杜門著

書得理學之傳

同安
縣志

李獻可字堯俞號松汀同安人隆慶丁卯舉人萬歷癸未
進士初授武昌府推官疏滯雪抑讞獄得情上官事有

不決屬之輒刃解臬椽有犯法者臬囑寬之不從故相
張居正獄起人爭刺死虎獻可曲宥其老母妻孥張姻
黨曾尚書坐受寄贓累萬窮搜株連獻可寬其期使自
輸事竣闔家匍謝曰非公悉逆首鞭笞矣徵入戶科給
事中會潞王之國疏請諭制在國無以縱敗禮在途無
以擾困民太后聞大怒請加譴帝特全之越日譙宮中
疏自袖墜顧近侍曰此李某疏勿失也南兵部侍郎王
世貞請先師廟用天子禮樂而哲廡之祀有所訂定獻
可言國學擇奠用八脗十二豆籩郡國仍用侯禮十哲

宜進南宮適兩廡官升范仲淹世貞心服他如請內帑
以賑飢饉決章奏以防壅蔽仰法紀以全安攘所條陳
鑿鑿中窾轉禮科右刑科左主試山西時慶得士值京
考以莊愼輔鑑裁物情翕如陞禮科都給事拜官甫三
日上皇太子出閣講學疏言冊立之典可稍緩而待來
年諭教之典不可停而虛今日皇長子今年十一歲去
古人八歲始學之時已踰其三宜及今春孟特令禮卿
酌定儀注擇吉施行至於輔導尤宜選孝悌博聞有道
術者爲之何必委巷伯之倫而祕之房闥之內哉疏入

有旨謫外元輔王家屏力爲申救封還內降至于再三
帝怒甚削籍罷歸家屏亦遂致相事獻可抵家日以書
史自娛事繼母先意祈嚮待叔父愛而能敬推有贍無
撫季弟甚篤悉予先貲構廬居之誘誨款至人不知其
爲異母也溫謹謙退與人交情摯於文不以所長掩人
不言人過有善吹揚如不及起家二十年田宅僅中人

產年六十一卒

舊志參閱書同
安志遜菴全集

李光縉字宗謙號衷一晉江人戶部主事仁之子光縉生

四歲而仁歿稍長寓目成誦舉筆成章十九爲諸生閎

覽博物善古文詞不沾沾舉子業師事蘇濬濬深嘉之謂異日必成大儒萬歷乙酉鄉薦第一日研經史及朝章民隱以備經濟痛士之爲制藝者竄入二氏顯背朱子爲文殼文則以示之的就正者盈門得其緒餘多取科第有欲爲地于闡中者正色拒之或勸之仕則曰昔人以二千石不逮縫掖擁書萬卷何假南面百城爲也歸益潛心大業取四書易傳玩索討論而手筆之其理潔淨精微其詞平正通達座師黃懋忠之子開府閩中足未嘗至其門尺牘往來論學論政絕不及私郡太